



**TERTIB ACARA KEBAKTIAN MINGGU  
GKPS P.BULAN-RESORT POLONIA MEDAN  
Minggu LETARE, 14 Maret 2021**



**TOPIK:**

**“IDOP NI UHURNI NAIBATA NAPAGOLUHKON”**

**Live streaming: [www.gkpspadangbulan.com/tv](http://www.gkpspadangbulan.com/tv)**

**Tata Ibadah: <http://www.gkpspadangbulan.com/tatib>**

**1. *Votum – Introitus – Tonggo***

P : Riap ma hita jongjong!

Ibagas goran ni Naibata Bapa, pakon Tuhan Jesus Kristus, ampa Tonduy Napansing, sitompa langit pakon tanoh on. Amen!

P. Malas do uhuru, sangah ihatahon halak bangku: Laho ma hita hu rumah ni Jahowa. Haleluya, haleluya, haleluya.

P+K. Haleluya, haleluya, haleluya (idodingkon)

P. Martonggo ma hita: Ham Tuhan Naibata paridop ni uhur hubani haganupan jolma. Puji-pujian ampa tarima kasih do isombahkon hanami hu Bamu, halani pangkopkop-Mu bannami. Iondoskon Ham do Anak-Mu na sasadain in hu hamateian, laho mangkopkop hanami pardousa on. Pasu-pasu Ham ma hanami na martumpu on, ase lambin tubuh pangarapan na baru bannami, janah ibagas malas ni uhur hanami manoruskon horja ampa tanggung jawab na dob iondoskon Ham bannami. Ibagas Jesus Kristus ipadas hanami tonggonami on. Amen (*Hundul Kuria*)

**2. *Mandoding 407. Puji ma Jahowa (1-2)***

1. Puji ma Jahowa Tuhan Naibata, ai marjumbalang do Goran-Ni in Haganupan jolma sai marsombah ma, sai hagoluhkon hata-Ni in Holsoh haganupan mambur, tubuh ma malasni uhur Gok bai pangarapan holong na totap, rap mangolobkon Goran-Ni in

2. Ningon do marsombah bani Naibata, puji ma la pargogoh do in Ulang marnaloja sai irikkon ma, rap mambalosi hata-Ni in Holsoh haganupan mambur, tubuh ma malasni uhur Gok bai pangarapan holong na totap, rap mandodingkon: Haleluya!

**3. *Hasasapanni Dousa***

P : Riap ma hita jongjong!

Martonggo ma hita, sopotkon hita ma dousanta hubani Tuhan Naibata! Ham Tuhan Naibata Bapanami, sitompa lagit pakon tanoh on ampa haganup pangisini. Dear do haganup itompa janah ipasu-pasu Ham haganupan in. Itotapkon Ham do hanami jolma laho manramotkon haganup tinompa-Mu in. Halani hisap ni daging pakon hasurakahonnami jolma, lang ipardulihon hanami hadearon ni tinompa-Mu in, gariada iparseda hanami do in marhitei na mamboiskon gogoh ni tanoh, manroboh hayu pakon parseda harangan, asal ma jumpah na sininta ni uhurnami. Hinorhon ni in gabe mangarou janah gok hangaluton ma hagoluhan i tanoh on. Maidop ma uhur-Mu mangidah hahurangannami na lang mandalankon parentah-Mu in. Pabayu Ham ma uhurnami janah pakei Ham ma hanami gabe parhiteian-Mu laho patorsahon janah paulakkon hinadear ni tinompa-Mu ibagas gok tanggung jawab, ase sonang hanami manggoluh janah mardamei pakon tinompa na legan. Ibagas Kristus hanami martonggo. Amen.

P. Tangar anjaha haporsayai hita ma Hata ni Naibata, bagah-bagah pasal hasasapon ni dousa. Ia na mangkaholongi hita, anjaha na paluahkon hita humbani dousanta marhitei daroh-Ni, na manjadihon hita gabe harajaon hamalimon bani Naibata Bapa-Ni.

Ibagas holong ni Naibata, domma isasap haganup dousanta. Halani ai, pataridahkon hita ma tanda-tanda ni pargoluhon na bayu. Hasangapon ma bani Naibata ibabou.

K. Amen.

(*Hundul kuria*)

**4. *Mandoding 356. Hita Ganupan Pardousa (1+3)***

1. Hita ganupan pardousa roh ma bai Tuhanta in Daroh-Ni in do manasap ganupan dousanta in Roh ma podas hita ganup, ai bai Tuhanta sirsir do ganup Sai ipaima do hita, pasonangon-Ni ganup

3. Ganup na marhamubahon janah porsaya tongtong In do na hu hasonangan ronsi sadokahni in Roh ma podas hita ganup, ai bai Tuhanta sirsir do ganup Sai ipaima do hita, pasonangon-Ni ganup

## 5. *Hata haporsayaon*

P. Riap ma hita jongjong!

Saksihon hita ma haporsayaonta in, songon na sinaksihon ni haganup halak na porsaya bani sab tanoh on!

P+K. Ahu porsaya bani Naibata Bapa, Pargogoh na so tarimbang, na manompa langit pakon tanoh on.

Ahu porsaya bani Jesus Kristus, Anak ni Naibata na sasada in, in do Tuhanta, na tinubuhkon ni si Maria sanggah nape haliaban, marhitei Tonduy Na Pansing. Na manaron na parngit, bani panorang ni si Pontius Latus, iparsilangkon, matei anjaha itanom, turun hu nagori toruh. Mulak manggoluh hun bani na matei bani an patoluhon. Naik hu surga anjaha hundul i siamun ni Naibata Bapa, Pargogoh na so tarimbang in. Hunjai ma la mulak magira laho manguhumi halak na manggoluh pakon na dob matei.

Ahu porsaya bani Tonduy Na Pansing, bani Kuria parsadaan na mapansing in, parsoran ni sagala na mapansing in, bani hasasapan ni dousa, bani parpuhoon ni angkula, pakon bani hagoluhan na sadokah ni dokahni. Amen.

## 6. *ACARA KHUSUS (Mangondoskon SK Penetapan Sintua, Syamas pakon PAW Pemuda)*

(sanggah mandoding ayat 3 roh ma hulobei Pengurus Pemuda PAW, Sintua, Pakon Syamas)

### A. **Mandoding 375. Ai Ise Suruhonku (1+3)**

1. Ai ise suruhon-Ku sai nini Tuhan in  
ra lao pararatkon harajaon-Ni in,  
Buei do namangaku lao manghorjahon in  
garama anak boru, ge bapa inang pe,

3. Ijon do au Tuhanku sai suruh Ham ma au,  
mandilo ganup jolma bai harajaon-Mu.  
Hubere ma gogohku 'ge panorangku pe,  
seng ra au marnaloja, paima ganup roh.

### B. **Agenda mangondoskon SK**

#### C. **Mandoding 466. Ringgas Hita Marhorja (1+3)**

1. Ringgas hita marhorja,  
ase torsa marhasonangan goluhta on.  
Sirsir do tong Tuhanta  
mambere gogoh lao marhorja hubanta on  
;: Nai ma da tongon, Amen sai saud ma sonin.

3. Bolag openi juma.  
inganan manaburhon bonih ni Hata in.  
Ase ringgas ma hita.  
janah tongtong mambere buah bai Tuhan in.  
;: Naima da tongon, Amen sai saud ma sonin

## 7. *Tingting + Tonggo Pangapition*

### 8. **Mandoding 149. Ham Sipagoluh Au (1+3)**

1. Ham Sipagoluh au parayak Ham au on.  
Sai ulang Ham mandaoh humbagas uhurhon.  
Roh Sipagoluh roh tongon, baen Ham au Anak-Mu tongon  
Bani daroh-Mu usah au, putih songon bunga ma au  
Putih tongon, putih tongon,  
bani daroh-Mu usah au, putih songon bunga ma au.

3. Togu Ham uhurhon, Bamu ma tarik in  
Ai langkah-Mu do tong, na sol usihankin  
Roh Sipagoluh roh tongon, baen Ham au anak-Mu tongon  
Bani daroh-Mu usah au, putih songon bunga ma au  
Putih tongon, putih tongon  
Bani daroh-Mu usah au, putih songon bunga ma au

## 9. **Ambilan: Efesus 2:1-10**

## 10. Manggalang:

P : Paima iondoskon hita galanganta, tangar hita ma lobei Hata ni Naibata na gabe onjolan banta laho manggalang, aima na tarsurat bani:  
Psalmen 116:17-18: “Bamu ma galangknonku galangan puji-pujian, anjaha goran ni Jahowa ma padilo-diloonku. Bagah-bagahku bani Jahowa, hugalari ma, hugalari ma i lobei ni haganup bangsa-Ni”.Sonari patumpu hita ma galanganta.

## 11. Tonggo Galangan – Panutup :

P : . Riap ma hita jongjong!

Martonggo ma hita mangondoskon galanganta hubani Naibata!

Ham Tuhan Naibata Bapanami, paridop ni uhur, harohan ni sagala pasu-pasu. Tarimakasih ma isombahkon uhurnami hu Bamu halani hun Bamu do ijalo hanami pasu-pasu na gokan dear pakon na laingan. Bani panorang on isombahkon hanami hu Bamu na gabe galangannami, dirinami pakon humbani hinadongannami na dob binereMu in. Pasu-pasu Ham ma galangan na sinombahkonami on, gabe galangan na mapansing, na mambahen harajaonMu lambin marhataridahan i dunia on. Ungkap Ham ma uhurnami marhitei Tonduy-Mu, ase lambin ididah, ibotoh janah ihamalaskon uhurnami buei ni silayak-layak-Mu, na dob ijalo hanami pakon na sihol bereonMu ope hu bannami. Ajari Ham ma hanami laho mangondoskon galangannami na patut galangknonnami hu Bamu. Jalo Ham ma galangan pakon tonggo elek-elekname on, ibagas Jesus Kristus Tuhannami. Amen

K : (Kuria mandodingkon Hal. No. 281:5)  
Bamu, o Tuhan manambah au on  
Bamu ganupan na dong bangku on  
Seng bulih be sirang na rapat Bamu  
Martuah sai sonang na roh hu Bamu

P : Ham Bapa parholong atei na tarsulur, Bapa na sintong anjaha Bapa pardear layak hubannami jolma. Domma iain Ham hanami gabe anak-Mu. Lang ipaturut Ham hanami hona uhum janah manaron halani pardousaonnami. Tapi isuruh Ham do Anak-Mu na sasada in, in ma Jesus Kristus laho manobus hanami humbani dousa. Lang humbani omas barang pirak hanami itobus Ham, tapi

marhitei daroh ni Anak-Mu na sasada in do na maningon manaron janah matei tarsilang. Ham Bapa, bobai Ham ma tongtong hanami ase manggoluh hanami bani goluh na bayu, anjaha buhai Ham ma uhurnami laho patalarhon harusuh ni uhur-Mu ibagas haporsayaonnami pakon Ham ampa hasomannami jolma. Ibagas Kristus Jesus hanami martonggo. Amen

P. Ham Bapanami na i nagori atas, sai na papansing ma goran-Mu. Sai roh ma harajaon-Mu. Sai saud ma harusuh ni uhur-Mu i nagori tongah on songon na i nagori atas. Bere Ham ma bannami sadari on hagoluhan ari-ari. Sasap Ham ma dousanami songon panasapnami bani dousa ni hasoman na mardousa dompak hanami, Ulang hanami bobai Ham hu parlajouan. Paluah Ham ma hanami humbani pangangou!

K. (Manoruskon tonggo on marhitei na mandodingkon)  
Ai ham do simada harajaon, pakon hagogohon, ampa hasangapon, sadokah ni dokahni. Amen.

P. Laho ma nasiam, janah “papansing nasiam ma Kristus Tuhan in ibagas uhurnasiam, tongtong ma nasiam sirsir patorangkon bani haganup halak na manungkun nasiam pasal onjolan ni pangarapan nasiam”

Jalo ham ( hita ) ma pasu–pasu humbani Tuhan Naibatanta  
Ipasu–pasu anjaha iparorot Tuhan Naibata ma Ham (hita). Isondangkon Tuhan Naibata ma bohi-Ni hu bamu (hu banta) janah maidop ma uhur-Ni mangidah ham (hita). Idompakhon Tuhan Naibata ma bohi-Ni hu bamu (hu banta ) janah ipasorap ma damei-Ni bani tonduymu (tonduyta bei) Amen.

Ganup: (mandodingkon) Amen..... Amen Amen!